



SYNOD IN RELIEF ANCHANG HAWM



To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008
SEPTEMBER 2023

Hinna Vâk

AN ORGAN OF THE TANGPHAI PRESBYTERIAN CHURCH



BAN JÂK AH PATHIAN NASEPNA

- Eurokuilo
- Naupang thu awi
- Khanglaite leh Damtheina

EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. S. Lama Vaiphei, Executive Secretary
Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hawipakkim, Secretary, CKNP
 : Upa Genminlun, Secretary, CKKP
Business Manager : Pu Lalbiaklian, Office Superintendent
 TPC Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

- | | |
|-------------------------------------|----|
| 1. EDITORIAL | 01 |
| 2. KOCHUAM HUANG | 02 |
| 3. EUROKUILO | 04 |
| 4. NAUPANG THU AWI | 07 |
| 5. KHANGLAITE LEH DAMTHEINA | 10 |
| 6. BÂN JAK AH PATHIAN NASEPNA | 13 |
| 7. SERMON | |
| a) Jawlnei Jonah chanchin a pat.... | 16 |
| b) Ga pha sua ding in? | 18 |
| c) Pathian khut changlam | 20 |
| 8. SUNNA | 26 |

Moderator : Rev. Ngurthanmawia Sailo
 Secretaries : Rev. C. Lalrinliana (Sr.)
 : Rev. Thanglianlal (Jr.)
 Finance Officer : Rev. S. Khaikhawlam
 Statistician : Upa Kaikhokam
 Executive Secretary : Rev. S. Lama Vaiphei
 Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Beigual tha a hi ta, Kochuam te'n Thagau lam malzawlna tamtak tawh lawk tak ah i mat zaw theina ding un dawn hitiu.
2. Gamsung buaina zia ah panlatu pawl chuam chuam ah puitute a ding in pauchap hitiu.
3. Synod in Relief House a sak zing lai hi buaina umlo ah lawting tak ah a chia zawm zing thei na ding in dawn hitiu.

KIPUMKHATNA

I gamsung buaina in gapha a sua umsun chu thingtang mite kipumkhatna hi a hi. Amavang, kipumkhatna kiti hin umzia thuk tak a nei ah, a umzia gilpen chu Lalpa Jesu leh Kochuam te kipumkhatna hi a hia, zia chu nu leh pa'n kipumkhatna bep hin a umzia a pawdawk zo hi ah gen a hi.

Kinalo, kisuallo leh kikaptualo hi kipumkhat ah simthei ei pua, semkhawm, pangkhawm leh thuakkhawm tiang hile kipumkhatna ah simthei a hi nai puai. Bangtiang ah kipumkhatna hi thûk a diam leh? Kochuam kigawpkhawmna a um takleh a genkhak sek uh chu a pawl pawl ah um chiat ah kigawpkhawm ding a hem, sakhat ah kigawp ziang ding ti hi dawtna a hi sek hi. Mathematician te chun pakhat leh pakhat kigawm chu pani a tia, Politician chun pawlkhat leh pawlkhat kigawm chu pawlkhat in a pawm ah, Bible hinle lei mi leh van mi kigawm in pumkhat in ei pawm uh a hi.

Manipur thingtang mite hile pawl chuam chuam tamtak ah kikhenzak sa i hiu ah, pawlkhat ah i kigawpkhawm thei ualeh chu kipumkhatna hawi tak hi ding a hi. Ki pumkhatna ding a chun lungthim munkhat leh dawidan kibangte â dingin bangma haksatna a um pua, dawidan a kibatlo takleh hung buai sek a hi.

A pha ding pen daw i hi chun kipumkhat thei a hia, zia ding a chun chângam le a ngai sek hi. Lalpa Jesu chun Van ah lalchutpha lopi tak hung nusia in, Angel te chawihawina la nisin zan sin ah chimlo ah a dawn te thangai zolo in, suak gualin a hung kingaitawm a hi kha. Kipumkhatna lampi hi haw i nawp ualeh kingaitawmna te leh châna te i nei uh a ngai hi.



Kochuam Huang

RMHS Admission chungchang

Buaina zia ah hung tâite haw lak ah kua tawhbang RMHS ah ki-admit nuam a um chun admission fee umlo ding in, a kai pat ni ah kipat tuition fee a piak pan ding in admission piak hi'na. Zia thu hi Student Leader-te dawina gual ah School enkawltu Committee-in guanggalna a hung siam a hi.

Gam buaina zia ah haksatna tuakte Sawmdawlna Chungchang

Mizoram Synod panpina ah gâl tâite chenna ding Relief House sak pat a hita. Zia Relief House-te hi Buallian, Sumtukphai leh S. Bualkawt khaw hausate'n a gamsung ua In sakna ding mun a hung tuakdawnateu ah sak a hi. A masa ding in In 100 tiang sak phawt ding ti a hi. Zia Inte chu Kochuamte'n tawmngai sua ah, thâ sênkhawm ah, thakuan khawmna hun kiguat dungzui ah kuankhawm ah sak zel ding ti a hi. Thakuan ding dan guanggalna ziaqual hin siam a hi:

a) Sumtukphai : S. Munnuam Bial leh New Lamka Bial

b) Buallian : Lamka Bial leh D. Phailian Bial

c) S. Bualkot : Mata Bial

Ziagual ah Kochuamte thakuanna ah nek leh dawn dingte hi amau Bial chiat in a kipuakdaw sek ding uh hi'na.

Chun, Relief House ah umlo ding, mun chuam ah um dingte ahiloleh In sak piak ngâilote kiang in a nuai ah kitaklang gual ahin Relief Sum piakdaw hi'ntin, ziana ding ahin Bialtu Pastor-te kiang ah khiatsak ding hi'ntin, Bialtu Pastor-te'n list a hung siamfel zaw phat ua leh Office lam ah a hung piaklut ding uh hi'na.

Min In lua, se vek : ₹ 7,000

Min In lua, se veklo : ₹ 3,500

Mani In, kang/se vek : ₹ 10,000

Mani In, kâng/se veklo : ₹ 5,000

Sunday School lam

Kum 2022 Pathian thu Exam result khaikhawmna ziagual a hi-

| | |
|-----------------------|-----|
| Honours | 447 |
| 1 st Class | 544 |
| 2 nd Class | 866 |

HINNA VÂK

| | |
|-----------------------|------|
| 3 rd Class | 1030 |
| Pass | 2887 |
| Fail | 429 |
| Exam zosia | 3316 |

- Kum 2023 Sunday School registration hi August tha tiang ah sukfel vek ding hi'na.
- Kum 2023 Naupang leh Senior Kikhawmpite hi gam dinmun in a zil lo ziak in neilo phat ding hi'na.
- Kum 2023 Pathian Thu Exam le sailo ding hi'na.
- Sunday School Training-te le neilo phawt ding hi'na.

Gam Buaina ziak ah gâl tâi Kochuam UP A LEH MEMBERTE DINMUN DING

Manipur gam ah buaina ziak ah Kochuam Upate leh Member amau khua leh Kochuam nusia ah khaw dang Kochuam ah lawite dinmun ding SEC 4:7 chun ziagual guanggalna a siam hi:-

1. State pawlam ah um Upate : Manipur State pawlam, a bîk ah Delhi, Guwahati leh Bangalore Kochuamte hi Kochuam piting gual ah chiapi a hi nai pua, Zia kochuamte ah Kochuam Upa um kha a um chun Kochuam

Committee ah pang in Kochuamte'n mat phatchuam thei hi'nau.

2. Manipur State sung ah um Upate : Manipur sung ah Kochuam mun chuam chuam ah Upa umte chu i Dan bu (kum 2022 9th Edition) Bung V: 1(h), (i), (k):(iv) gual in chiapi hi'na. (Têlkit a hilo chun pem Upa chu Tualsung Kochuam Committee member a hi pua, Kochuam nasepna ah mat chungchang ah chun Kochuam Committee thu thu hi'na)

3. Kochuam memberte dinmun ding :

a) Um det dingte : Tu ah a umna ah um det dingte chu pem lekha ahiloleh testimonial ngâilo in, a umna chun member gual ah ngai hi'ntin, sawm ah khat le a umna ah chun a piak ding hi'na.

b) Um detlo dingte: Um det gawlote chu a umnau ah kipat Biakin nâi pen pen in min ziklo in kikhawm phawt intin, sawm ah khat ahileh a Bial lui min ah piak thei dan dan ah piak sunzawm ina.

PCI apat sum dawn

PCI lam ah kipat in Relief sum, ₹ 2,50,000/- dawn a hi.

“EUROKUILO”

(Nasepte 27:14)

~ *Evan. Jamkhawpau*
Lingsiphai

Thumasa : Hinna vak Editor a pat in “Eurokuilo” ti thupi ah mang ah article zik ding ah hiatsakna ka vak mu in, ka changuallo dawisakna chang ka hi ti ka hiat in, langkhat lam in kipak um ka sa ma ma ziang a hi. Himaleh, zia thumal “Eurokuilo” kiti apat article vak siamdawk ding dan chu ka ngaitua leh ka lung a dawng khawp mai a hi. A ziak chu “Eurokuilo” kiti thumal hi, Hepina, Kipakna, Lungnatna ti thumal haw gual ah umzia nei ahi pua, Thigua (hui) min mai ahiziak in, vak chiapi dingdan hi hiat thiam haksa kasa khawp mai a hi. Himaleh, Editor in “Thupi hung kipia hi eima dawidan dan ah hei danglam thei (eima dawi dan dan ah chiapi thei) ahi” ti ahun genzui ziak in neukhat ka ngaituana a hung jangkhai deu a hi. Zia dungzui a chun, keima het dan dan leh kei ma dawi dan dan in hun chiapi mai ding ka hia, nangmau hiatdan leh ngaidan tawh a kituaklo khak tak inle, simtute’n lei la ngaithiam mai ding uh ka hun dawn masa a hi.

Thumapui : I gen tak gual un, “Eurokuilo” kiti hi thigua (hui) min a hia, ziachu ei pau in mâl thigua le a kiti sek a hi. “Eurokuilo” kiti hi hui zang mai mai hilo in, huipi hat ma ma siatna huaisia tak mai tun sak thei leh tizat um ma ma hi dan a hi. A min hi mundang khenkhat ah chun “**Euroclydon**” le a kiti sek a hi. Sawichak Paula lawi Rom khawpi lam zuan ah tuiipi chung ah a kitawl lai ua, Ni 14 hial An nek zia, tui dawn zia le umlo khawp ah thi leh

HINNA VÂK

manthai ding bep bep kinem ah a um ziang uh khale zia Eurokuilo zia hi ala hi. Huipi hat hi thagau lam thil a chun, buaina leh haksatna i tuak sekte genna in ala kimang deu sek a hi. Zia chu tuni ah i chiapi guat dan uh le a hi.

Thagau lam Eurokuilo : Pastor Liankhawpau in La ala phuak pakhat a chun *“Van Zion gam zuan ah i chia lai uhin, mâl thigua Eurokuilo chu hung hang in, Long leh mite chu a hun tawk mang zo tai”* ala tia. Zia thagau lam Eurokuilo hin, gingtute سوالنا lam in a tawk lut sek a hi. Himaleh, zia thagau lam Eurokuilo hi, Pathian in ei uh i kisiampat kit na ding un a mang sek a hi. Upate’n *“Mihiam siampatna dingin Vannîm a ngai hi”* a la ti sek ua. Buaina leh haksatna i tuak te’u (Thagau lam Eurokuilo) hi, i kisiampat kit na ding ua Pathianin a tunsak a hi nuam ma ma sek a hi.

Israelte khale, Lalpa dawilo gual ah a um phat tak uleh, Lalpa a hun hawl kit theina ding un, buaina leh haksatna

(Eurokuilo) a chung un a tunsak sek a hi. Himaleh, Lalpa lam a ngat kit ua, Lalpa a ko phat tak uleh, Lalpa’n zia a buaina’u leh a haksatna’u Eurokuilo a pat chun a hukdawk kit zel sek a hi. Tu hun ah buaina leh haksatna Eurokuilo i tuak te’u haw hile Lalpa naina leh kisiampatna ah i mat uh chun, Lalpa’n zia i buaina’u leh haksatna apat hin ei hukdawk ngei ding a hi.

Eurokuilo tuak khate chun a damna ding uh a ngaitua sek ui :

Haksatna leh buaina tuak lehle a damna ding ngaitua diaklote chu mangthai ding ahiu. Sawlchak Paula lawi khanle Eurokuilo a tuak khak ua khan, a damna ding uleh a zawtna’u mun damtak ah a tun theina ding un, a puakgik (a van gik puak) te’u kha tuipi ah a paitha’u a hi kha (Nasepte 27:18,19). Hebrai 12:1 na a khanle, *“ Ei sunokphak leh i chung ua bek gitlonate paitha’i tiu”* atia. I thilchîn phalo, i umdan hawilo ei sugiksakte haw i paithaklo ua ahi chun, zia buaina leh

haksatna (Eurokuilo) a hin mangthai kha ding ihu hi.

Kei mudan in, i gam uh hile Lalpa lungnatna ah a dim zaw tak zia ah i kingaitua phat theina ding ua, Lalpa'n zia gual buaina (Eurokuilo) hi i chung ua a tunsak a hi dia aw! Ka ti sek a hi. Khristian gam hingal in, Pathian dawilo zawng (kani lei) in a dim zota, Pathian ginglote (Biren lawi) in ei suk mang piak guat (ei vatchai piak) ulehle, ei haw'n ki bawl gaw tei tei ziang nalai. Khristian lak hi ngal ah Drugs, No. 4, WY, Zu leh khamthei zat chuam chuam chia a chia (kikhawng hawi ma ma) ziang. A zuakle ei uh, a ne le ei uh kihi zel. Pathian helo (Police) te'n ei mat piak ua ei haltum piak uh lehle ki bawl tei tei ziang. Nekkuk chakkuk thu ah lah, Government apat Scheme bang a hem khat a um leh, Khristian kahi kiti ngal Officerte, MLA te, Nam sepaite hawn a hun lep lep uleh, a mudingte kiang a kimkhat khel tung zo ngai

sek talo. Kuama'n zakda in nei puaitiu in, kingaitua in kisiampthak gaw chiat zawi tiu. Ziagual i hinchun uh, i chung ua bek zing gitlonate haw hi paitha ah Lalpa lam i ngat thakkit lo ua ahichun, Van Zion gam tung zolo in, zia siatna Eurokuilo hin ei sumangthai kha ding a hi. Ziaziakchun, zia siatna lak a pat hi i dam (i suakchak) theina ding un, paithak thei paitha in, Lalpa Pathian bel thakkit hitiu.

Thukhakna : Kalate 3:40,41 a chun, *"I umdante'u ki enchain in, Lalpa lam ah kilekit hitiu. Van ah Pathian lam in i khutte'u jak in, i lungthimte'u in ngato hitiu"* a ti gual in, zia buaina Eurokuilo zia ahin Lalpa bel thakkit hi tiu in, i hinkhua'u siamthak kit in, Lalpa lam nga thakkit leu hin, Lalpa'n zia i haksatna'u apat hin ei hukdawk ding a hi.

I hindan leh i thilchîn phalote paitha ah Lalpa lam nga thak kit thei chiat ding in Lalpa'n i ma'u ei pui chiat ta hen.

“NAUPANG THU AWI”

~ Rev. N. Khanpau
Jubilee Kochuam

Thumapui : Zia thupi pawimaw tak zik ding a dawisakna ka chan hi ka kipak tak zet hi. Hinna Vak Editorial Boardte chung in kipak thu kagen hi. Khawvel pumpi le a pawimaw pen leh i ngai khawk pen uh chu Naupang hi a hi deu pen hi. Insung ziang inle naupang um lo na chu ahulim thei pua nawp le a nawp thei him him puai. Naupang um lona piting ngen insunga um khawm leh chenkawm chu a nawp tak tak thei puai ti i hiat chiat uh a hi.

Nu leh Pate : Pathian in Eden huan a siam zaw a khan a en ah hawi a sa ma ma ziang hi, himaleh a enkawl ding leh a veng ding um lo a ti ziak in, A ma mel kibatpi in Pathian in mihing a siam ah zia chu Eden huan ngak ding ti maleh a ma ngawn ah um chu pha asa pua, a umpi dingin numei a siam piak a, A pawsal siam chu a min ding in Adam a sak ah, numei min ding a chun Evi a sak ta a hi. Amau chu Pathian in Nupan masa pen dinga a siam chu ahi, ziaka chun Nupan (Nu leh Pa) hi a pawimaw takzet ahi ti aki lang hi.

Zia gual a chun khawvel ahin mi nupan ahung hi phat

ua leh a lungthim ua lian pen leh a kineppiu thupi pen chu cha nei di hi a hi. Cha daw mama ah nei thei lo a um thei kit hi, zia lo a chun cha nei ma leule cha pawsal daw ah nei theilo leh cha numei nei nuam nei thei diak lo a um kit hi. Ziaka chun cha leh te hi Numei leh pawsal um khawm ziak a nei thei ziang ahilo dan akilang hi. Pathian in a piak leh piaklo thu ki nga ahi zawi, La phuaktu khat in *“Damsung ka tuak tapo la sawl hi hen”* ti hi hiat zing apha ma ma hi.

Ziaka chun cha leh te hi Bible in a gen gual in Lalpa ah i go chan uh ahi ati a hi.

Cha leh nau et kawl : Bible in Naupang chu a chiana ding dawl kakmu lechin a têt nung tiang inle hemil puana ati hi thu dik a hi. Ka bial fan lai in khaw khat a chun “zintunna ka nei sek sungkuan khat hi aum ah, A nupi chu a fel ma ma ziang ah, nitak lup di kuan sin leh insung kikhawpna a nei sek ua, A chate a neu nalai ua himaleh Bible châng ahil ah nitak sin leh a tisak sek hi. Kum bangzat ahem nung a chun a chanu chun pawsal a hun nei ta, aman le Pathian malsawmna cha bangzat ahem ahun nei ta, zia nunga chun a man le a chate chu a nu’n ahil na gual a chun aman le a chate a bawl pi sek ei vei, a tek nung tiang a le hemil lo ding a hi.

Cha leh te etkawlna hin nupan chu pankhawm tei ding a pawimaw hi, Himaleh pawsal te ki kawi thianna ziak le hilo in, Upate thupil chun sakhi a pi a san leh a no le a san ahi a ti gual un cha leh te hi a tamzaw hi Nute khuta um ahi tina hileh a kilawm hi. Ziaka chun Nute mawpuakna hi a sang diak hi. Khawkhat a chun meithai khat

hi a um a, a inkiang teu in nisin leh thau me hi a kang zing ua, nikhat chu a chapa chun nu ei un le thaume kang hi tiu ati lai a chun, A nu’n a chapa kianga chun bawi thaume la du leh lekha ha sim in sim le chin ati piak hi.

A nu thu mang in ama’n le thei tawp sua in lekha a hun sim leh kum bangzat ahem zaw a chun Officer lian tak a hung hi ta, Thau me nek senlo khawp in sathau chu a nei tau a hi.

Naupang thu awi : Khawvel ahin a lian a neu a dingin le thu awi hi a pawimaw hi. Lalpa Jesu’n a nungzui te kiangin “*Ka thupiak la zui ua (la awi) a hi leh min ka nungzuite ahiu ti hun he thei in au*” ati ahi kha. Zia gual a chun naupang nu leh pa thu awi chu Bible in a gen gual in a dam le sawt in ah ti ahi ngala, Damsawt la nawp leh lei ah la Pathian chu la Nu leh Pa thu awi chu damsawtna le ahi ban ah chapa, cha hawi leh it um chu ahi sek hi. Zia gual mite chun lei damsung ngei inle malsawmna leh vangphatna a dawng sek uh ahi.

HINNA VÂK

Bible a chun Naupang thu awi i mu te lak a khat vak gentiam hitiu, Abraham in a chapa Isak Moria tanga Pathian in a gen guala lat ding a ha pui chanchin bep hilo in a kan tawm ah chemcha sut dia a kidaw ziaka khan Isak khankhua hi ahawi in vangphatna leh malsawmna tamtak a dawn hi ti aki mu ahi. Ziaka chun Naupang thuawi te chu nu leh pa kipak na leh lungdamna bep hilo in amau a dinga le damsung nawpsak na leh kipiak na'n a zui tei tei ahi sek hi.

Bible ah Naupang thumang ki mu khat chu Joseph a hi. Jakob in chapa sawm leh ni a nei a, zia te laka chun Joseph hi a sawm leh khatna ahin, A nu leh A pa thu mang diak hina e, a pa'n le a daw chuama, a puanak ding le a jem chuam a bawl piak ahi kha, cha thumangte hi nu le pa'n le a ngaina diak ui. A thumat dan chu a suapi te'n kawkhuk sung in a khum ua mi dangte kiang in a zuak ua, bangma genlo hial in thumang tak mai in a chia mai hi. A thumat na chu Pathian in a hemil pua, a

lungsiat tu ding a la siam piak a, Aigupta gama Pharoah Lal na nuai in liantak mai ah kaw in a um a hi.

A u te kiang in a ki puan lai khan a ute kha mit sangkau in ki entua ziang in au maw? Himaleh a u te kianga a thugen khan lungthim a khawi ma ma hi. Kei ma zia in ki maw siat kiu inla, kuama ki ngaw diak kiu in, Pathian in i hinna ding ua zia gam ahin eila sawl masak ahi ati a hi. Lungnat hun leh phuba lak thei hun tak inle a thumat na dungzui in bangma bawlllo hial in lungdam tak leh mai tai tak in a U te a thamuan zaw a hi. Pathian in a um pi zinga a tha thampuai ti aki lang hi.

Thukhakna : Zia thu a pat ahin Naupang thumat lo zia in i gam ua hin thi phat lo ah thi hi khanglai atam pen hi ti mithiam te sui dan ahi. A hi zia in Naupang thumangte, lei ah a nu leh pa thumangte leh Pathian thupiak mang zingte chu lei lam malsawmna vuk ah aum ding bep uh hilo in Van malsawmna le Lalpa'n vuk ding ahi zia in Naupang thumang hi thei ngei ding in Lalpa'n malsawm ta hen.

“KHANGLAITE LEH DAMTHEINA”

~ *Pro. Pastor Genlemthang Suantak*
Mata Pastor Bial

Mihing hinkhua hi i vak ngaitua veng veng ahi chun, Pathian in i dam kum ding ua ei la guat lawk piak chu kum sawmsagi kum sawmgiat sung vel ahi, ahin tulai khawvel ahin mi khen khat hichu kum za val dam bang le ah um tho a hi. Kum zakhat ivak ti ziang leh asau thim a bang na kum upa lam deu te aneulai hinkhua nunlui ni’u hun ah matlai teu bang ivak dawt ahi chun zani gual bep abang nalai hi ti hi atam zaw apat dawn hu na i dawng sek uh chu ahi. Mihing kum tamtak dam ten ka dam sawt ta luai tai ti ding mi hi vang ma ma ding in ging chat aum hi, i vak gen ut pen chu ahi leh kum za lam dam ten le ahinkhua mat sung sau sa lo ahiu leh i khanglai hun matsung uh hichu mit phiat lo kal ah kichai pai ziang mai a hi. Kuama mihing khanglai hun mang den ti ki hia nailo ahi tuni tiang ahi’n, ziaziak achun i khanglai hun mantam leh khanglai hun chawmcha hi mat thiam a ngai ma ma ahi.

Chun, mihing hinkhua hin damtheina hi thil pawimaw pen te lak ah pakhat ahi kiti lele ki ti khial ding in ka ging cha puai. Damtheina ah pawimaw dan hi ihiat chiat ding un kaging cha, ahin tuni hin Khanglaite leh damtheina hi saulo in vak en suk hitiu.

1) Khanglai leh damtheina:
Ephesa bung 6:1-2 na in ei gen gual akhan i damthei na ding in lei chung ah i nu leh i pa thu zawm a ngai hi, chun damtheina hi Lalpa ah kipan ahi ti hi ihiat sa vek ding un ka gingcha a hi. Khanglai ihi sung ah i

HINNA VÂK

damtheina ahawi lo ahi chun i lawi i gual le kipa zo lo a hi. Taksa damthei na ding ahin nek leh chak le ki sum thiam hi apawimaw khawp mai hi, khanglai hun sung ahin nek leh chak iki sum zaw lo ahichun i damtheina hung kiam pai intin, mi musit ah hung ki um pai ziang ding ahi. Khawvel daktor thiam ten i taksa lam damthei na hi ahiat nau mang in ei piat thei ma ui ahin zia haw chu kumtuang adai zo ngai puai.

2) Lalpa ah ginum na: Khanglai ten i damthei na ding ua hin ei siamtu lam et zing ah pawimaw ahi, chun khanglai i tha hat lai hun chawmcha sung ahin lampi pani bep tel ding a um ah zia chu khawvel nawpchen na lampi leh ei siamtu a ding ah ginum na lampi, khawi zawk lampi la zuan diam nang in? Lalpa a ding ah i ginum ah i khanglai thahat lai ama lung i tuak nak ahi chun ama kiang ah damna bukim damthei

na leh lawting na bukim a um vek hi. La khanglai hun sung Lalpa ah ding ah ginum na lampi ala zui mawng mawng tia hun haksa thuak male chun aman a ban thahat in hung kai intin la teknung tiang in la kisui ding le phal piak puanna. Chun Lalpa kiang bep ah kumtuang damna aum hi.

3) Thagau lam damna: I khanglai tha hat lai hun chawmcha sung ahin a pawimaw pen pen thil pakhat chu thagau ah damna hi a hi. Thagau ah damna la neilo ahi chun kum tampi dam ma lechun dam man um lo ding a hi. Thagau damna chu khawi ah hawl ding ihu em, khawvel ah hawl ding ihu em, i lawi leh paite kiang ah hawl ding ihu em, khawvel leh i lawi ipai ten thagau damna ei piat thei na diam uh, thagau damna chu ei siamtu i Lalpa kiang bep ah um a hi. Taksa damthei male chun la thagau adamlo ahi

chun nawp na bang ma umlo ding ahi, ahin taksa damtheilo male chun la thagau a dam nak ahileh nawpna bukim chang ding lahi, taksa damtheina la hawl masat sang in thagau lam damna ala hawl masa him him tia. Khawvel siam apat tuni tiang ah mihat ah ki thang Samson khanle a khangdawng hawi lai in taksa damtheina leh ataksa nawp na mai mai ding ala hawl khak ziak in a khanglai tha hat lai tak in ahinkhua ala ki chai ta ahikha, ahin Leng David khan vang ama taksa damtheina leh ahinkhua damna ahawl sang in Lalpa ala chawihawi ah thagau lam damna ala hawl masa ahi kha, a unau lak ua ataksa le a neupen tha hat lam ale zawng khal pen ahi vang in aman akhanglai hun te ah a siamtu lung ahawl a ah thagau lam damna ala hawl ziak in ama sang ah damthei zaw hat zaw a u te chung ah Lalpa'n alang

kai ah leng dinmun tiang in Lalpa'n ala guat eivei maw. Ziaziak chun taksa damna sang in thagau lam damna hawl masai tiu khanglai nule pa ten, tichun thildang zosia Lalpa'n i mawmaw dungzui un hung piak belap ding a hi.

I khanglai hun chawmcha sung ahin damsawt na i dawi ahi chun ei siamtu lam en zing mai hitiu ama kiang ah damna bukim aum hi, khawvel nawpnate hi hun chawm lo cha a ding mai leh khawvel nawp chen na hin i damtheina te ei lak piak ah gual pha lo ah ei kawi ah a tawp leh thina than khuk ah ei pui lut nalai ding ahi, aw ka khanglai chan pi, u le nau, nu le pa, pi le pute, tuni hin nang in bang lam damna la dawi pen em, hun kikkel ma hin, nawpna mang ten le tuni zam san in thagau lam damna hawl masa pen hitiu, dan leh hung kikkel khan ah zia phat chuleh ki nung le thei ta pua khanla. Ziaziakchun Lalpa damna bukim neitu Lalpa bel hitiu.

“BÂN JAK AH PATHIAN NASEPNA”

(Pawtdawna Thu 17:8-13)

~ Rev. Andrew LR Khiangte
i/c Mata Pastor Bial

Amalekte chu nam humham tak a hiu ah. Galdona nam dangte go lak piak ah tualtha khawk salo nam a hiu. “Amalek mite lawipha” ti hi Israel mite lak ah ki musitna paukam lar tak pakhat a hi. Zia gual ah nam gilo leh huhamte chun Israel chate Kanaan gam lua ding ah a chia lai un Rephidim mun ah a la subuai ui ti i mu thei ui. A mau subuai ah dotu Amalekte do ding in Puitu Mosi chun mi zendok ah do ding in Joshua kiang in thu a pia, zia bep chu hilo in tâng ah a kalto ding thu leh zia tak a pat chu Pathian lam ah a bâñ jak ding a hi thu le a gen ngal a hi.

A jing a chun a gen gual in Joshua leh a lawite chun Amalekte chu a va do tau a, Mosi le tâng lam ah kal in a bawl thei tiang bawl in Pathian lam ah a bâñ a jak ta a hi. Mosi’n a bâñ a jak lai sia chu Israel chaté’n a zo ua, a bâñ a kiak niam phat leh a hatlo zaw’n a pang sek ui ti i mu thei ui. Zia kidona a pat chian tak ah i mu thei uh chu i kingak na ding diktak uh chu Pathian ahia, A ma ah i kingak ngam a,

i kidona te chu Lalpa a ahi zaw, zawna le i chang ngei sek uh a hi.

I gam in buaina nasa tak i tuak ua, i unau tamtak teu in In leh lo, hinna lul tak a chên ua. Zillai naupang te’n le a hun mantam tak uh a chên khawlaw ui. Kidona mun in i um ua i hinkhua’u a pangai thei lo a hi. Ziagual ma chun i kochuam maban vâk tak mai nei ah iki hiat lai in i ngaitualo na lam ah i chia uh a ngai ta a hi. Zia hun

a hin Pathian Kochuamte i hi gual un Pathian lam ah bân jak ah i hi ding dawl teu i hi uh hi a pawimaw tak zet a hi.

Synod level leh Bial ah le i thei dan dan in pan i la jel ua, sum leh pai le i seng nasa ma ma ta uh a hi. Ziate chu Pathian lam ah bân jakna dan chikhat hi ngei in a. Mani theidan chiat ah Pathian lam ah ban i jak uh a pawimaw hi. Mosi chu Israelte puitu a hia, a bawl ding dawl tak bawl in Pathian ma ah a bân a jak ah, a hatnau chu Pathian a hi ti a hia chian a hi. Amalek nam huham takte dona ah pawimaw pen chu Pathian khut ah kituklut a hi ti a hia chian a, a bawl mai a hi. A sepiate leh mi khekhat te chun chemte keng in galdo na ah a malatu hileh ti in a ngai maithei ui, himaleh Mosi chun a bawl ding diktak ti in hangsak tak in Pathian lam ah a bân a jak mai a hi.

Buaina i tuak zing lai ua hin gal do dingte, gal jam buai pi dingte, damlo enkawl tute leh mawpuakna chuam bîk nei bangzat hem ki um in a. Zia

hun a hin Kochuam nasemtute bîk hin i bawl ding dawl bawl ah Pathian lam nga ah bân jak zing a pawimaw khawp mai a hi. Zia Pathian nasepna na chu i mualsua zo em ti ngaitua chian a pawimaw khawp mai hi. Kochuam mi Numei chapang galdona pang khalo tamtak umte hi Pathian ko ding ah i puihuai a pawimaw takzet hi. Mani ah Pathian ko hunsak mai lo in midangte le zia lungthim chu pu ding ah puihuai jel hi a pawimaw bawk a hi. Kochuam leh pawl chuam chuamte malâkna in Pauchapna thupi te haw i dawng jel ua a kipak um ma ma hi, sutzawp jel ding le thil pha a hi. Zia khêl lam ah pawimaw chu titakjet na leh veina tak tak tawh Pathian lam ah bân jak a pawimaw a hi.

Mosi chu a bân jakna lam in a chau hial ah, ama tha in a jak zo ta pua, Aron leh Hur te'n a bân teni chu a dawp piak gel tau a, zawna a chan tiang un a jak thei hi ti i mu thei ui. Ei uh le i buainau ahin Pathian lam ah nasa tak in bân i jak tau ah, chau khawlaw hial leh bân

HINNA VÂK

jakpi ngai hial tiang a le i do uh
a ngai maithei hi. Mosi chun
Puitu a hi na jal in chau maleh
a tawp tiang ah bân jak a ngai
hi ti a hia, a mualsua ham ham
a hi. Ei haw le Pathian umpina
tamtak i dawn ziak un tuni i
dinmun tiang uh hi i tung thei
ua, a tawp chan tung gua ham
ham hitiu. Kochuam mipi te'n
le bawlding pawimaw tak i nei
ui ti hia in, i puitu teu haw le
mihing hatlo leh chau thei a
hiu ti hezing in a hatlo nau leh
fellona teu sawisel mailo ah
a bân jak teu jak pi ah hihat
dingin i pawimaw uh a hi.

Buaina huaisia zaw chun
phatlam hung manaw jel in a

lang jel ah, Pathian kiang ah i
pauchap na'u lawtinna hi ngei
in a. Zia ahi zing lai a chun mi
tangpi te lungput leh khawhei
dan thîl in i buaina leh kidona
hi puaknat ah neilo gual in a
lang in ka hia, a chang leh ka
lungthim hi a beidawn thim
sek hi. I kido nau hi Lalpa a i hi
sak takzet ua, a dawidan gual
ah do ding ah iki piak daw lo
chun zawna chu chang khel
pua hitiu, zia chu Israelte chate
hun lai a pat in imu chian thei
ui. Ziaziak a chun hung un zia
kidona hi Lalpa a ahia, zawna
le ama a ahi ti hin Chiang hitiu
in, ama kiangin kilân vek hitiu.

PAUCHAPNA

*Tulai ah Kochuamte mamaw pen chu, matchak pha leh
chang kang tak-tak te ahi pua, pauchap mi a hi zawi.
Thagau Thiangtho hi khawvel thil ah a kipuang ngai pua,
mihingte ah a kipuang zaw sek hi. ~ E.M.Bounds*

*Pauchapna hin Pathian a sudanglam pua, keima ei
sudanglam zaw a hi. ~ Charles Finney*

“JAWLNEI JONAH CHANCHIN A PAT IN I KHRISTIAN HINKHUAU SUICHIAN THAK KIT LEU HIN MAW!”

(Jonah 1:1-17)

~ Upa G.T. Zuana
Bethlehem Kochuam

Jawlnei Jonah hi Assuriate vanglai hun ah mitin â ding ah mêlma lau um leh huat a hilai ua Pathian sawlchak a hi.

A chanchin Bible ah ka hiat lim lai in lamdang ka sa ma ma ah, a ziak chu Pathian nasemtu, a sawlchak ah pang hingal ah Pathian sawlna mang nuamlo ah, ama dawitelna ah Tarshish lam ah a taimang hi mak ka sa a hi.

Ahin ka ngaitua thak a hi chun Jonah a ding in a melma, a sugenthei tute Assuriate khawpi Nineveh ah a gitlo teu a sim lo ua leh ni sawmli zaw leh Pathian in Nineveh khawpi chu sumangthai ding a hi thu va gen ding chu thatnawp um hilo ding him a hi. Gawt henla mangthai kingang leu ti ngei ding a hi. Zia a pat hin i Khristian hinkhuau ki enchian thak tiam hitiu :-

1. Melma te hepi ding :

Pathian in ei guat na chu melmate hepi ding in ei ti

a hi. Melma te hepi ding chu a haksa ngei e maw! Ei uh le Pathian chate hi chung in tu leh tu ah i tuak uh i melma teu, i In leh nei leh lam ei suksiat piak, ei nuaichimit gawte leh ei bulu zing sekte hepi ah Pathian zangaina a channa ding ua pauchap piak leh a kiang ua thu va gen ding chu thatnawp a um paw nasai maw? Jonah le zia gual chu a hi ziak in Tarshish lam in long ah chuang in a taimang a hi. Bang ava tuak

HINNA VÂK

kha ta le, Thigawpi nasatak tuisuagiat chung ah long ah a chuan na'n a tuak a hi.

2. Pathian ei guat na leh ei sawlna te i mat nawp lo ah, ama sang ah thildang i tel zawk a hi chun haksatna tuak ngei ding ihu.

Tu i thiltuak teu a pat hinle ki suichianthak kit hitiu aw. Pathian chate i hui ah, ama i zammang san sek zia un zia thilte hi tuak himai kha hitiu tin ka ngaitua hi.

3. Unaute haw Jonah kipiak daw thak kitna hi a lopi ngei e maw! âi a sân ua a tuasiat tuak nau chu kua pen zia a hem ti a hawl lai un Jonah chung in a aisan uh chu a chuta. Ziaphatchun bang ka hun law ta diam uh leh tia Jonah a dawt lai un, aman ei dawm dawk unla tuisuagiat sung ah ei paithau in. Zia phat chuleh tuisuagiat chunang uh a dingin hung thip tan a. Keima zia ah zia gual thil tuak la hui ti ka hengal

ah a ti tai. A thil tuakteu ama zia ah ti aki puanga, ama paithak ah um leh a thiltuak uh thip ding in a gingcha, chutichun a kipedawk mai a hi.

Ei uh le Jonah gual in tu ithiltuak teu hi keima zia ah ti'n Pathian ang sung in ki pelut leu hin i buaina teu hi Pathian in ei sukmit piakngei dingin ginchak a um hi. Jonah kipiak dawna ahin Pathian in a hinna humbitna dingin Ngapi a kisazosan ala kawi ah Ngapi sung in tuisuagiat lau um lak apat in bit tak in a kiselgu thei ah. Ei uh le i buainau apat Pathian in bit tak ah i um na ding ei siam piak ngei ina. Ama angung a ikipiak lut i mawpuak uh a hi.

Unau dawitakte Jonah chanchin apat in i gingtu hinkhua ki suichian thak leu hin Pathian in ama chate i hinau, i khristian hinkhuau a ding ah kûl te eimu daw sak ngei ina. Lalpa'n a thu malzawl ta hen.

“GA PHA SUA DING IN?” (Luka 6:43-45 ; Matt. 7:17-20)

~ Pi Tingjeneth
Jubilee Kochuam

Gingtu mimal tinte hi gapha sua ding ah kineppi chiat ihu. Lalpa dawi gual ah gasua i hi theina ding in nisin i hindante hi ki ngaitua hitiu.

Thingbâk le a kungpi tawh kizawpna nei lo chu a thi, ga a suatheilo gual in Jesu tawh kizawp matna neilote chun gapha a sua thei puau (Johan 15:1-2). Gasua lo Thingbâk satthak a hi gual in ga sua lo Khristian chu sat thak ah um ding a hi. Pathian pawm tâk gapha i sua theina ding un Khrista tawh kizawp matna hing zing nei a pawimaw hi. Gingtute hin Ga bang gual i sua na em? Mite haw hin eima a pat i ga sua hi nekthei a hina diam, pawlam mi te et in Gingtu suanum tak gual in ki lang ma le hin i ga hi miten bang gual in ei ngai diam?

Thingpha chu a ga le a pha, Thing phalo chu a ga le a pha ngai puai ti a hi. Gapha i sua theina ding in leh mite'n le i ga a nek theina ding un hindan pha ah i hin a pawimaw hi. Thingpha lo chu a ga le a pha puai. Gingtu Pathian cha hi ngal ah i um dante, i paukamte, i tawi dante hi mite a ding ah nektheilo ga a hi khak ding a lau um ma ma hi. Phûk ah a

um tak leh mei lak a selut hung hi ding a hi ngal a.

Mipha chun a lungthim gobawm a pat thil pha a hun suadawk sek in mi gilo chun a lungthim gobawm a pat thil phalo a hun sua dawk sek a hi. Gapha suana ding in lungthim pha lungthim thiangtho a pawimaw a hi. Lungthim sia ngaitua na phalo te'n vang

HINNA VÂK

gapha a sua dawk ngai puau
hi.

a law khum ah nitak lam in a
vuai tha ngal a hi.

I Lalpa Jesu'n theichang
kung gal in a vak mu, a dua le
a pha ma ma, a hing hawi ma
ma hi. A mun in a va chia ah a
ga pakhat le a mu pua. Hansia

*"Hansia lawkhum ah i um lo
na ding un gapha sua gua
chiat hitiu"*

Lalpa'n a thu malsawm ta hen.

MALZAWLNA

August 4, 2020 ni chun Lebanon gamsung tuipi pam in git ngaitak leh hâttak ah puakzak a um ah, zia chun mi tampite, a sang ah sim kisukha in, a za ah simte'n thina a tuak uh a hi.

A gam mipite chun Nuclear bomb ahilo leh bomb hattak ah gamdang mite'n a hung dona ua a bawl uh hi ding in a muangmaw hial uh a hi. Himaleh a puakzakna mun ah chun bomb mu ding a um pua, zia mun chu thaichi hawina ding ah kimang har (fertilizer) kawina munpi ala hi a hi. Zia thaichi hawina ding ah damdawite chu kum 6 chia ta ah kipat ala kikawi a hi tâk zia ah chemical reaction ala um in a hung puakzak ta mai a hi. Zia thaichi hawina damdawi chu mat ahi ah, thaichi tampi â ding ah hawi leh thai tampi neina ding ah damdawi pawimaw ma ma chu lo ah thezak ah matna ding ah manglo ah sawtpi kawi ah a um chun, thil lau um tak, hinna le sukha thei hial ah thil lau um a hung suak ta a hi.

Zia gual ma chun Pathian ah kipat malzawlna i dawnte hile thaichi hawina damdawi har gual hi a hi. Midangte piak sawn ah thezak ah hawmzak ding ah Pathian in ei piak a hi. Malzawlna Pathian ah kipat i dawnte hi eima phatchuamna ding bep ah i kikawi ah, midangte kiang ah i piaksawn theilo a hi chun eima â ding beplo, i kîmvel ah mite â ding ah le thil lau um tak hung suak thei a hi.

“PATHIAN KHUT CHANGLAM”

~ Rev. Ph. Thianneilal Vaiphei
i/c Delhi Kochuam

Thumapui: Hebrai pau ah “**Yad**” leh Greek “**Cheir**” techu “**Khut**” (hand) tin akilet dawk sek hi. Khut (abik takin: ‘**ho dexios cheir**’ khutchang lam) hin hâtna leh thilhitheina a etsak hi. Thuthung Lui hunah khan, Pathianin “Khut bânthahâtna/thilhitheina ah mi sualte kha zaw ahi dân uh” a la gên lawk sek hi (Deut.33:2, Josh.8:19, Sam 31:15 cf. Mark. 14:62). Malai mi ipi leh puteu khan le mi veikawlawngte chu mi batlona khat in ala gen sek ui. Ziaziakachun, veikawlawngte chun a hinau ala zachatpi ma ma sek uh a hi. Bible in bân zawitha (a zawi) atî chu “*hât lo*” melchikna a hi sek a, hât theina dinga chun “*ban thâ hihât*” a ngaisek a hi (Isai.35:3, Vaihawmte 9:24).

1. Khut Changlam Pawimawna leh Etsakna :

Bible-ah Pathian khut changlam chungchang thu tampi mu in aum a, “*Lal Jesu chun, a kiangua thu agen zaw ah chun vana puito in a um a, Pathian changlam ah a hang chu ta... Ama ngei kha Pathianin Lal leh Hukdamtu dingin a changlamah a chawihawi ta ahi... Kuan em thiamlo a chansak thei ding? A thi kha Krista Jesu chu a hia; a hi, a tho kit a, Pathian changlam ah um, eihun*

sawisa ditu kha a hi bawk... Mihing Chapa hi Thilhitheina changlam ah kichû, van sôm chung ah hung di chu a la mu di la hiu,” (Mark.14:62, 16:19, Nasepte 5:31, Rom 8:34).

Thuthung Lui-ah i mu gualun, mi dangte kianga thuneina leh thilhitheina lânsâwn tute, malsawm tute chun a khut ua a khawi khel uh a ngai â, khut pani chu mangtho maleu, khut changlam chu duthusam zawk a lahi sek hi (Gen.48:13-14,18, Deut.33:2). Pathian

HINNA VÂK

kiang ah kilemna hâlmang thillat di bâwngchal luchung ah kilemna siam di pa'n khut a ngak khel ala ngaina ziak pên tak chu hâlmang thillat dite tawh kizawpna a nei zia etsakna a hi (Ex.29:20, Lev.1:4, 8:23-24, Job.40:14, Hab.2:16). Thuthung Thak hun ah chun Khut ngak rawngbawl na kha Thagau Thiangtho tunsaktu leh thilmak hitheina dinga mat a la hi kît bawk hi (Mk.6:5, Acts 8:17-19, 19:11). Chun, 2 Samuel 18:18-na thu-ah Absalom hiat zingna **Suang-Tun** (monument) kha le Hebrai pau ah a kiziak dan ah chun **"Absalom Khut"** (Heb. אב־שָׁלֹמֹה יָד) ti a lahi mai hi!

2. Thilhitheina Thagau A Etsak :

Mika 3:7-ah chun, *"Lalpa Thagau ziaka thilhitheinate, vaihawmnate leh hâtnate chu ka dem taktak hi,"* ti mu a hi. Zia thu apaṭ hin changlam kiti hin hâtna, thilhitheina, thuneina leh vaihawmna te hi thil kizawm vek ahi zia a taklang chian mama hi. Ziaziakachun, Pa changlama Lal Jesu kichû chu Thilhitheina Thagau a hi ti etsakna a hi. Pathian khut

hât tak leh thilhitheina nei tak ahi dân gënna ahi bawk. Zawlnei Isai kiang ah Pathian a kipuanna ahin a kichian diak hi, *"LALPA chun khut hât takin hitia hin ka kianga a gên â, zia namte lampi ahin ka chia vêl lona dingin ei thunun a hi!"* (Isaia 8:11). Khut chun thu a gen thei puai ti i hiau a, zia thu hin Pathian Khut Changlam hin Mutheilo Thilhitheina Thagau lopitak a etsak hi.

3. Pathian Chawihawina Leh Khrista Thuneina :

Pa Pathian khut changlam ah Khrista va kichû chun a etsak chu, Khrista thuneina (Authority) chungchâng hi a hi. Lal Jesu Krista chun Pathian vênbitna, dawisakna leh lungsiatna a dawng a, Pa Pathianin a panpi-zia, ataksanzia leh thuneina a piak-zia kichiantakin a taklang hi. Hebrai 1:13 ah kimu gualin, Pa Pathian chun la melma te zosia la tâwdên dingah ka bawl masia, Lal Jesu chu a khut changlam ah, a thilhitheina nuaiah um a, chawldua tadi'n a tii! Mark 14:62-ah chun *'Thilhitheipa khut changlam'* ti

khel khel in a ki ziak ngei ngei hi.

Nasepte 5:31-ah chun Pathian changlam ah Lal Jesu a ki chûi tia a gên umzia chu, *Pathianin a chawihawi-zia leh Lal leh Hukdamtu-ah a guat-zia, zâumna mun ah akawizia leh thil zosia chung ah thuneitu ding ah a kawizia* a tâklatna a hi ti kichian takin ei hil ui. Ziakiachun, Pathian chu mihing te gual ah khut leh kêng nei ah, a chang lam ah Lal Jesu a chut sak tak tak gual hi lo deuin akilang hi. Ziakiachun, Lal Jesu chun Lei leh Vên ah vaihâwmna leh thuneina zosia a khut ah a châwi vek a, mithi leh mihing vaihawm piak di tu, Lal pên leh thuneitu a hina gêna in a mang hi (Mt.26:64, Eph.1:20-22, Heb.10:12, 1Pet.3:22, Thup.3:21).

Charles Hodge chun, *“Lal Jesu Pa changlama a kichut hin khawvel pumpi chung a lalna leh thuneina a etsak a, zia gual chawihawina hi Pathian chau in a chang thei hi”* a ti hial hi. **John Calvin** in le, *“Pa changlama kichu tihin Pa’n a*

kianga thilhitheina a piak chu a etsak a, Lal Jesu’n ama min ah lei leh van ah vai a hâwm theina di chu a hi” a ti bawk. Leiah Lal te’n le chawihawi di a nawp te chu a changlamah a kiang nai ah a chutsak sek gual hi a hi. Zia dinmun hi Vansawlchak te leh thilsiam dang dang te chungah ziagual dawisakna, chawihawina leh dinmun sâng hi a piak thu Bible-ah khat-vei ma a lang puai.

Zia Thuneina leh Chawihawina hi Hukdamtu lopi pên Jesu Krista chauvin a phu, a kiang ngeiah chun piak a hi tai. Ziakiachun, Lal Jesu chu thilsiam zosia te, boruaka thuneitu, thagau soal zosia te, hun zosia leh kochuam te chungah thuneitu hidinga Pa’n a chawihawi leh a guat a hi. Chun, Pa chang lama kichu mai mai hilovin, Pathian chang lama um, sana thaumei kawina pasagite laka vâk vêl vêl a, a khut changlam ah aksi pasagi chawi ah, Pa changlam ah kipat in a mite dawtpiak sek tu, Thagau Thiangtho mang ah kochuam leh gingtute

HINNA VÂK

enkawla khawvel ah nasêm zing tu a hi bawk hi (Rom 8:34, Thup.2:1, John.14:26, 16:7-15, Heb.7:24-25).

Thutawpna : Chanchin Pha Johan 14:3 ah i mu gual un Jesu'n, "Ka kiang ah um dingin hung pui ding kahi, ka umna nang uh le la um theina ding un" tiin ei hil ui. Ama umna chu Pathian changlam ahi (Eph 1:20, 3:11; Heb 1:3; Nasepte 5:31; Sam 80:17). Chuti ahichun Lalpa'n zâumna mun ah a thisan jal ah a hun kawî di ahi tâk ziakin ama dawi dân leh a thupiakte (Namtin nungzui a siam – Johan 28:19; Chanchin Pha hil- Mark 16:15; Athu hiatpitute hi- Nasepte 1:8; Thupiakte sawmte Exodus 20) zawm in zia khawvel ahin Ama din Lalgam tungdawk din thei tâwp sua zêl hitiu. Bangma lau puai tiu Lalpa chu bangkim hithei a hingal a, ama â ding ah i din ngam phawt chun ama'n ei umpi zing ding a hi. Pathian in ama hepîte â ding ah chun a patna dingun thil bangkim a bawl piak sek hi (Rom 8:28). Thilpha hi lam ah pil a, thil phalo lam ah mawl

(Rom 16:19) ding in Lalpa'n ei dawi ua; kukalna lam ah kilep hat lo in, lungthim tak ah kipumpiak in LALPA na chu sêm in; kinepna lam ah chun kipak tak ah um in, thawkna lam ah chun thuak zo tak tak in, gunchu tak in pauchap zing hitiu (Rom 12:11). Aziak chu 'Tulai thawknate hi tunung ah i Lalpau Jesu'n ei un puikhawm ni phat tak leh lopina i chan diu te tawh tepi kham a hi him him puai' (Rom 8:18). Thilsiam zosian Pathian chate Pathian ma ah i kilatna diu ni chu a ngakla ma ma ta ngal ua; thilsiam zosia le siat suana suak ah kipat suachat sak hitin uh zalên sak gua chiat hitiu. Thagau chun i hâtlonateu ah ei panpi sek di ahi. Aziakchu, Pathian in a guatlawkte chu a ko sek a, a kote chu thiam a chansak a; chun, thiam a chansakte chu a chawihawi sek hi (Rom 8:30). Unau, Pathian in a chawihawi di la nuam em? thiam a chansak di la nuam pua em? Lalpa â din i bawlthei tiang tiang theitâwp ah bawl hâm hâm gua chiat tai tiu. Amen.

KHRISTIAN DIKTAK TE HINKHUA

Khristian kiti chu a chawmkim tak ah gen in Jesu Khrista nungzuitute tina a hi. Lal Jesu khawvel ah a l nlai in thilmak tamtak a bawl dawk hi. A thil bawlte hi i et chun ama bawl ding ah le kilawmlo ti thei hial khawp a bawl a um hi. Langkhat lam ah et in mi ginch k gual lo takin na a sem kit hi. Mi neizo leh mi minthang tamtak sangin mi genthei leh musit umte tawh a kipawl tam zaw, khawt ng buaina leh siatna tamtak a suveng ah, a s ng danglam hi.

A malam ah kigen ta gual in Lal Jesu hinkhua ah a thilbawl mak mama leh ngaituana sukha ma ma pakhat chu Theichang kung a sapsiatna (Mark 11: 12-14 & Matthew 21: 18-19) hi a hi. Zia thu hi gun tak ah i ngaitua chun ngaidan bangz t hem a um thei hi, ziate chu - a) Lal Jesu'n bangziak ah zia theichang kung mawna bei hi kumtuang a ding ah a sapsiat ziang ahi diam? b) Lal Jesu thil bawl hi thil bawl ngai hilo (Against Natural law) ahi thei diam? c) Theipi kung chu aga hunlo (Mark 11:13b) in bangti'n a ga umthei mawng mawng ding ahi em? d) Zia Bible chang hi bang ziak ah Jesu chawihawi ah a umna tawh Jerusalem Temple a sukthianna kik l khel khel ah hung ki kawi ahi diam? Ngun tak ah simte chun ziagual dawtna bep hilo dawtna tamtak i nei ngei uh ginch k a um hi.

Lal Jesu'n Theipi kung hing hawi ma ma a sapsiat ziang hi Bethany khua lam zuan ah a lamzawt na a gilkiak bek ziak leh Temple ah sumkawlvei te amu ah a lungnat bek ziak tawh hi ding in i ngaitua maithei ua ahinla zia lam pang chu hi zawlou in – a nungzui, a tatsate leh Israel te chung ah Lalpa vaihawmna leh lungnatna chu ziagual ma hi hung hiding ahi ti a etsak nawpna ahi zaw daih hi.

La Khristian hina bang chan ahi tam? Pathian a ding in bang zat la sem dawk ta em? Mi hiat kham bep ah sem nalai lahi em? Lal Jesu la hinkhua a pat in mi'n amu thei nau em? Athu bep ah gen gen ziang a tak ah muding umlo Khristian lahi kha em? Ahilo leh Khristian hizing ngal ah ga nei kei lo, pawlam kilawm na bep tawh um nalai lahi em? Tuni hin ki ngaitua thak in, a fello te ki siam fel leu hin nawp a um hi. A chutilo chun theitawp sua ah Pathian na sem zing ngal, Lalpa mitmu ah pawm taklo leh mit kham um tak hi khak ding thil lau um a hi.

Lal Jesu nungzui - Khristian diktak, taksa leh thagau ah g sua leh mani kitodel, midang te a ding ah malsawmna hiding in Lalpa'n ei dawi hi. Ziagual gingtu chu hithei chiat ding in sim tu zosia Lalpa'n malsawm ta hen!

VAIPHEI THASIM DAN LEH A UM ZIA

~ *Pu Kamzakap
Lingsiphai*

- 1. Khuangtha (January) :** Khanglui te lawmzu lawmsa a nek hun lai uh khuang leh dâk thua ah nun a mat hun uh ahi zia ah khuangtha kiti a hi.
- 2. Dipi (February) :** Daidi tâk hun, a at hun a hi zia ah Dipi kiti a hi.
- 3. Vulte (March) :** Thing chikhat Vulte kiti a um ah zia thing chu a pâk hun tak a hi zia ah Vulte kiti a hi.
- 4. Thakau (April) :** Thing dua kau hun leh pul hun a hi zia ah Thakau kiti a hi.
- 5. Tunpi (May) :** Vacha chikhat phutuntun kiti khat a um ah a ma ham hun a hi zia ah Tunpi kiti a hi.
- 6. Thaphul (June) :** Gua zuk tam hun lai tak a hi zia ah Thaphul kiti a hi.
- 7. Thado (July) :** Aido pak hun lai a hi zia ah Thado kiti a hi.
- 8. Muktha (August) :** Kawlbu dawng, changmai dawng tun hun a hi zia ah Muktha kiti a hi. Upa te'n Muktha ah muklo chu Lo mabei ahi ala tiu.
- 9. Thazing (September) :** Lo lai ah Bu zing dip dip lai tak a hi zia ah Thazing kiti a hi.
- 10. Thagam (October) :** Khaw kichawi hun, gam nuai nawp hun a hi zia ah Thagam kiti a hi.
- 11. Thatang (November) :** Upa te'n betang nal hun ala tiu ah Bething a pâk leh a pai kihel limlem lai tak khu Thatang kiti a hi.
- 12. Phaltha (December) :** Bu at hun lai tak a hi zia ah phaltha kiti a hi.

Note : 1. Pastor Lungpau leh Pastor Thangkai in ziltibu ala suk lai ua ala zik dan tak uh chu a hi.

2. Mi kimkhat in December tha hi Khristmas hun lai ahi zia ah khuangtha ahi ti lawi le a um ua zia hi a diklo a hi, a zia ah chu Khristian um ma Khanglui ten khuang tha ala gen uh ahi tai.



Sunna

UPA MINLIAN

(26th September, 1957- 18th May, 2023)



Upa Minlian hi famta Pu Genlian leh Pi Chongzahawi te nupan kikal a gil a ga gochan panga (5) te lak ah a pali (4) na ahi, a suapi pawsal te lak ah a neupen a hi. Kum 1957 in Chiengkongpang, Churachandpur in a piang hi. Kum 1984 in Pi Songching tawh a kicheng ua, gil ah ga gochan pasal 1 leh numei 2 a nei ui. Kum 1979 in Lal Jesu chu a Lal leh Hukdampa ding ah sang in Hukdam kihatchianna a la chang hi. Kum 1999 ah Hilltown ah Pa tak tak camp ah pang in kihatchanna thak ahung nei ah. Kipak tak in a hung kiletkit ah, a chate a ding in Bible a hung puak piak hi.

11th July 1980 a kipat in Govt. bupang kikawppi in Electricity Department ah Peon na a la sem pan ah, 2005 in Junior Bill Clark in a kaisang ah, kum 2021 in a pension hi. Sepna ziak in a pianna leh seiletna mun nusia in December 1996 in Paite Veng, Imphal ah hung pemit in, zia kipat chun kum 2000 in National Games Village Govt. Quarter ah hung kichawlut in a thini tiang in zia mun ah chun a khawsa den hi.

Chanchinpha hung pawluttu Rev. Lungpau suante a hina zal in, a Pu dung sun ah Pathian nasem ah kipiadawk a umlo uh hi puakgik in anei ah. A pauchap zing lai in ama'n Kohcuam Upa hi ding ah kona a hung chan mai hi a pauchapna Pathian in a dawnhuna hi in a gel ah, kipak leh thanuam tak in, Gilgal Presbyterian Church (GPC), Langol Kochuam Upa ding in

HINNA VÂK

Ordination chu 11th September, 2011 ni in New Lamka Kochuam ah Rev. Lalbiak Sailo khut in a la chang hi.

Games Village ah a kichawn lut a kipat in GPC, Langol kochuam bêl in zia tak a chun Kochuam Upa hina taima tak leh ginum tak in a la sem zing hi. April 14, 2023 ni in NGV Kochuam inchuan a hi. Kochuam thak ah Kochuam Chairman hina dinmun pawimawtak piak in a um hi. Ahinla, a natna ziak ah a taksa a zawnkhal bek tak ziak in Kochuam ki inchuanni ziang inle pang zo lo in a um hi. Kochuam ah mawpuakna a la tuk khakte zia gual hi ahi : -

1. Presbytery ah : Presbytery Secretary, Upa examiner leh Auditor
2. Bial ah : Bial Secretary, Sunday School Committee Secretary leh Auditor
3. Kochuam ah : Kochuam Chiarman, Secretary, Treasurer, Auditor, Sunday School Superintendent/Asst. Superintendent.

Kum 2018 October tha in Liver cancer nei ahi hiatdaw in a hung um ah. Ki etkawlna hawizaw dawina ziak in December tha in Delhi mun ah Institute of Liver and Biliary Science (ILBS) Hospital ah etkawl in a la um hi. Ahinla, mihing dawi gual in a natna a dam tak tak thei puai. Sum leh pai sen a tawm zawk ding ngaituana in ki etkawlna maban sunzawm in Shija Hospital in December 2019 in admit in a um kit hi. Zia nung sawt lo a chun Covid- 19 natna hileng ziak in dawigual in ki etkawlna sunzawm theilo in a um ah, ahinla a natna in masawn zel hi ah hiat ahi ziak in November 2021 in Delhi lam ma zuan in ki enkawl ding a kipandaw kit hi. A natna in siatlam a manaw zel ah, ki etkawl ding dan um thei talo hi in doctor in a hung gen piak ziak in inlam a hung kilekit hi. Kum 2022 a kipat in Babina American Oncology Institute (AOI) in a ki etkawlna (supportive/palliative care) sutzawp in a um hi. Tukum

April tha tiang in chu a taksa a hung zawngkhal ma ma ziang ta, a lupna zalkhun chung ah etkawl ngai in a hung um tai. May 1, ah kipat khan a khaw hiatna a hung mang ah, insung leh kochuam miten a hat et thaw mai ah a ki um lai in dt. 3 nitak ah kipat in gamsung a hung buai pan ah, in ah ki enkawl thei talo in a zing dt. 4 ni in Shija Hospital ah admit in a um hi. Namsung ah Officer pawimaw tak takte, khawtang leh kochuam puitute, mimal ah kiphal leh tawmngai pawlte'n nasatak mai ah pan ahung lakpi na zal leh muntin ah um kochuam mite pauchapna zal in, a taksa zongkhal tak mai, khaw hiatna nei talo hiziang maleh, ama leh a enkawl ah umpi a chate pani chu dt. 16 nitaklam dak 8 vel in District Hospital puak tun thei in a um hi. Tichun dt. 18 nitaklam dak 7:30 vel in a kumtuang mun ding zuan in a leichung hinkhua a thasuak tai. A zing date 19th May, 2023 ni in Pu Kamneimang inmun, Compound Veng pansa in, Jubilee Kochuam intekna in vuiliamna programme mat a hi. Ama hi D. Phailian Thanmual ah vui in a um hi. A zi leh a chanu naupang pen ahi leh chu Delhi ah a la galzam tak ziak un a luang damsia ziang le mu lo ahiu. Delhi Kochuam in 19th May, 2023 ni in Pastor Quarter ah Condolence meeting a la nei pi ua, lungdam um a kisa takzet hi.

A chate: -

1. Hoineiniang
2. Lianlalsiam
3. Carolyn Manngaihlun

*Report petu
Upa Muanlal
Secretary (Sr.)
Phaiipi Presbytery*